



## De Bäckerknecht.

Es ledschd Gebäck isß außem Dwe,  
Die Kohle un die Brasche draus;  
De Bäckerknecht hadd Feierowend  
For heit; drum ruhd er sich aah aus.  
Weschwasser in die Kammer nuffer,  
Sererschd geschdricheld un geberschd,  
Die Sunndags Klufd noch außem Ruffer,  
Dann schdehd er do als wie e Ferschd.

Die Nachd bis in de helle Morje  
Am hääße Backowe se schdeh,  
Un immer gugge, immer sorje,  
Daß nedd die Hitz so groß, so gäh. —  
Jezd isser frei, jezd zeigt er, dasser  
E junger Herr midd Schick un Schliff,  
E Bernschdä<sup>n</sup>schbitz vun reinschdem Wasser,  
In de Hand e Schdock mit Herrschhorn-Griff.

So schdehd er vorrem Bäckerlaade  
Un hald sei<sup>n</sup> wuhlverdiendi Ruh;

Er findet bei manchem Määre Gnade,  
Un manchi lachd 'm freindlich zu;  
Hadd er devun doch meh<sup>n</sup> als ähner,  
Wannse de Kuchedääg gebrung,  
E Ruß gebb un manchmol aah mähner,  
E jeres kennd denn blunde Jung.

Un danze kann er wie e Balzer,  
Drum hodd er aah es mähnschd Geriß  
Beim Roddilio un Damewalzer  
Im Herbschd, wann Bäckerbaal als iß.  
Dovor dhud er ne dann an Kerwe  
Un Weihnachde un Faschnachd als  
E Zugerherz midd Honig ferwe,  
E Zugerbobb midd lauder Schmalz.

Es dhud emol e Mann rumschbugge,  
Der wold kä<sup>n</sup> Alexander sei<sup>n</sup>;  
Wann ich den Bäckerknecht begugge,  
Glaw ich, daß des kennd meglich sei<sup>n</sup>.  
Wie er so sauer un adreddche  
Do schdeht, als ob er grad wold sah<sup>n</sup>:  
Herr Borjemeeschder, waß koscht's Schdäddche?  
Meer kummd's nedd uff e Gille a<sup>n</sup>.